




食舊堂禁書

十五



道古堂外集

仁和 杭世駿 大宗撰

史記考證五

楚世家

卷章生重黎

尙書疏曰按昭二十九年左傳稱少昊氏有子曰重  
顓頊氏有子曰黎則重黎二人各出一帝而史記并  
以重黎爲楚國之祖吳回爲重黎以重黎爲官號此  
乃史記之繆故束皙譏馬遷并兩人以爲一謂此是  
也困學紀聞曰詩正義曰楚語稱顓頊命南正重司  
天以屬神命火正黎司地以屬民則黎爲火正高陽

時也言高辛者以重黎是顓頊命之厯及高辛仍爲此職故二文不同也黎實祝融重爲南正而楚世家同以重黎爲祝融謬也世家又云帝嚳誅重黎而以其弟吳回爲重黎後復居火正爲祝融鄭語以八姓爲黎後者以吳回繫黎之後復居黎職故本之黎也左傳少皞氏有子曰重顓頊氏有子曰黎史記以重黎爲一人又言以吳回爲重黎皆謬

乃立其長子康爲句亶王

大戴禮帝繫篇作無康

次子叔堪少子季徇

鄭語作叔熊季紂

蚡冒弟熊通殺蚡冒子而代立是爲楚武王

杜預注左傳云蚡冒楚武王父劉炫據楚世家以爲蚡冒是兄不得爲父孔穎達疏云世家之文多有紕繆與經傳異者非是一條杜氏非不見其文但見而不用耳

乃自立爲武王

顧炎武曰乃自立句爲武王句蓋言自立爲王後諡

爲武王耳古文簡故連屬言之如管蔡世家楚公子圍弑其王郟敖而自立爲靈王衛世家鄭世家皆云楚公子棄疾弑靈王自立爲平王司馬穰苴傳至當曾孫和因自立爲齊威王又如韓世家晉作六卿而

韓厥在一卿之位號爲獻子與此文勢正同劉炫云號爲武武非諡也此說鑿矣項梁立楚懷王孫心爲楚懷王尉佗自立爲南越武帝此後世事爾

十三年卒子熊羆立

左傳楚文王於魯莊五年卽位至十九年卒在位其十五年世家年表並不同

二十二年伐黃

左傳及年表俱在二十三年

二十九年魯僖公來請兵以伐齊楚使申侯將兵伐齊取穀

春秋經魯僖二十六年公以楚師伐齊取穀是年爲

楚成之三十八年

晉杲敗子玉於城濮

左傳晉救宋在楚成三十九年戰城濮在四十年

子莊王侶立

春秋經及國語俱作旅穀梁作呂

伍舉曰願有進隱曰有鳥在於阜三年不蜚不鳴是何鳥也

困學紀聞曰三年不蜚不鳴楚世家謂伍舉進隱於莊王滑稽傳謂涓子髡說齊威王此一事而兩見然莊王時嬖人伍參見左氏傳舉其子也新序以爲士慶呂氏春秋以爲成公賈不言伍舉

通鑑卷之六  
六年伐宋獲五百乘

左傳魯宣二年春鄭公子歸生受命於楚伐宋宋華元樂呂御之二月壬子戰於大棘宋師敗績囚華元獲樂呂及甲車四百六十乘俘二百五十人馘百人據年表魯宣之二年爲楚莊之七年

其王審立

楚語作箴

子康王招立

春秋經及國語俱作昭

於是晉宋魯衛不往

春秋經魯昭四年夏楚子蔡侯陳侯鄭伯許男徐子

滕子頓子胡子沈子小邾子宋世子佐淮夷會于巾  
此云宋不往誤

七年就章華臺

左傳楚子成章華之臺在魯昭七年於楚爲靈王六  
年

王行遇其故銷人

吳語銷作涓

遇王飢於釐澤

左傳國語皆曰乃求王遇諸棘闡

太子珍少

左傳作太子壬國語及越世家又作軫

七年楚使子常伐吳吳大敗楚於豫章

正義今洪州也

左傳魯定二年秋楚伐吳於豫章是年楚昭之八年也

王從臣子綦

左傳國語皆作子期

二十年楚滅頓滅胡

春秋經滅頓在魯定之十四年滅胡在十五年滅胡之年於楚昭爲二十一年年表同此作二十年

二十一年吳王闔閭伐越越王勾踐射傷吳王遂死

左傳及吳世家吳王伐越而死在魯定之十四年是年於楚昭爲二十年

昭王問周太史

說苑云太史州黎

是歲也滅陳而縣之

集解徐廣曰惠王之十年

左傳魯哀十七年秋七月己卯楚公孫朝帥師滅陳  
是年於楚爲惠王之十一年徐廣作十年蓋據年表  
八年魏文侯韓武子趙桓子始列爲諸侯

按楚簡王八年三家皆初立尙未列爲諸侯也周本  
紀威烈王二十二年命韓趙魏爲諸侯是年於楚爲  
聲王五年蓋後二十二年

子悼王熊疑立

六國年表及通鑑俱作類

嬰子■善而用申紀

國策作申縛

西起秦患北絕齊交則兩國之兵必至

顧炎武曰此兩國卽謂秦齊也索隱以爲韓魏非

二十七年使三萬人助三晉伐燕

戰國策齊韓魏共攻燕燕使太子請救於楚楚王使

景陽將而救之此云助三晉伐燕與楚策異

楚遣將軍景陽救趙

六國年表云春申君救趙春申君列傳云秦圍邯鄲

邯鄲告急於楚楚使春申君往救之此作景陽與彼

互異

九年秦滅韓

韓世家正義曰亡在秦始皇帝十七年是年爲楚幽之八年

同母弟猶代立是爲哀王

六國年表作弟郝立

四年秦將王翦破我軍於蘄而殺將軍項燕五年秦將王翦蒙武遂破楚國虜楚王負芻

秦始皇本紀作二十三年虜荆王二十四年項燕自殺

越王句踐世家

後二十餘世至於允常

允常吳越春秋作元常高氏越史曰夏自少康至桀  
中十二世按少康元年壬午至周敬王元年壬午凡  
一千五百六十一年吳之伐越見春秋昭公二十二  
年敬王十年也至是二千五百七十年矣越之傳國  
至於元常何止二十餘世耶

吳師敗於橈李

越絕書作就李吳世家作姑蘇

二歲而吳歸蠡句踐自會稽歸

國語句踐與范蠡入官於吳三年而吳人遣之越絕  
書亦作越王入官於吳三年吳王歸之

大夫逢同諫曰

越絕書作馮同吳越春秋作扶同

乃發習流二千

索隱虞書云流宥五刑按流放之罪人使之習戰任爲卒伍有二十人也正義

謂先慣習流利戰陣死者二千人也

徐天祐吳越春秋注曰笠澤之戰越以三軍潛涉蓋以舟師勝此所謂習流是卽習水戰之兵若曰使罪人習戰越一小國流放者何至三千人哉

教士四萬人

吳越春秋教士作俊士

吳王使公孫雄

吳越春秋作公孫駱國語作王孫雄

子王鼫與立

左傳作適郢吳越春秋作興夷卽位一年卒

商於析酈宋胡之地

正義酈音離

酈字無攤音疑攤字之誤

北破齊於徐州

集解徐廣曰周顯王之四十六年

考通鑑在周顯王之三十五年

鄭世家

友初封於鄭

索隱系本云桓公居域林

鄭康成詩譜韋昭國語註皆作咸林

三十三年宋殺孔父

春秋經宋督殺孔父在魯桓二年據年表於鄭莊爲

三十四年

九月辛亥忽出奔衛

辛亥左傳作丁亥

夏厲公出居邊邑櫟

春秋經魯桓十五年五月鄭伯突出奔蔡秋九月鄭伯突入於櫟

秋厲公卒

春秋經魯莊二十一年夏五月辛酉鄭伯突卒此秋字應是夏字之訛

子文公躋立

左傳作捷

冬翟攻伐襄王